

VENDIM
Nr.666, datë 4.8.2010

PËR DISA NDRYSHIME DHE SHTESA NË VENDIMIN NR.314, DATË 5.5.2010 TË KËSHILLIT TË MINISTRAVE “PËR ORGANIZIMIN, KOMPETENCAT DHE FUNKSIONIMIN E AGJENCISË SË ADMINISTRIMIT TË PASURIVE TË SEKUESTRUARA DHE TË KONFISKUARA, SI DHE PËR PËRCAKTIMIN E SHPËRBLIMIT TË PERSONAVE TË TRETË NË ADMINISTRIMIN E PASURISË”

Në mbështetje të nenit 100 të Kushtetutës, të neneve 15, pika 2, e 34/2 të ligjit nr.10 192, datë 3.12.2009 “Për parandalimin dhe goditjen e krimit të organizuar dhe trafikimit nëpërmjet masave parandaluese kundër pasurisë”, me propozimin e Ministrit të Financave, Këshilli i Ministrave

VENDOSI:

Në vendimin nr.314, datë 5.5.2010 të Këshillit të Ministrave, bëhen këto ndryshime dhe shtesa:

1. Në fjalinë e fundit të pikës 5 të kreut I, shprehja “...në përputhje me nenin 20 të ligjit nr.10 192, datë 3.12.2009...”, shfuqizohet.

2. Shkronjat “c” dhe “e” të pikës 2 të kreut II, ndryshohen si më poshtë vijon:

“c) në përputhje me kriteret e parashikuara në pikën 3 të këtij kreu, i paraqet Gjykatës për Krime të Rënda listën e administratorëve të pasurive të sekuestruara/konfiskuara, sipas dispozitave të ligjit nr.10 192, datë 3.12.2009 “Për parandalimin dhe goditjen e krimit të organizuar dhe trafikeve nëpërmjet masave parandaluese kundër pasurisë”, lidh kontratën e punës me administratorin, brenda 30 ditëve nga data e emërimit nga Gjykata;

miraton dhe lidh kontratën e punës me punonjësit mbështetës, të propozuar nga administratori.”.

“e) është përgjegjës për përgatitjen dhe dorëzimin, brenda datës 30 dhjetor të çdo viti, të raportit vjetor të administrimit të të gjitha pasurive të sekuestruara e të konfiskuara, në zbatim të ligjit nr.10 192, datë 3.12.2009 “Për parandalimin dhe goditjen e krimit të organizuar dhe trafikeve nëpërmjet masave parandaluese kundër pasurisë” dhe të ligjit nr.9258, datë 15.7.2004 “Për masat kundër financimit të terrorizmit”, si edhe për administrimin e pasurive të tjera, të cilat janë produkt i veprave penale apo të lidhura me to, administrimi i të cilave i caktohet kësaj agjencie, me ligj apo me një akt tjetër nënligjor.”.

3. Pas shkronjës “g” të pikës 2 të kreut II, shtohet shkronja “gj”, me këtë përmbajtje:

“gj) lidh kontratat e punës për administrimin e pasurive të sekuestruara apo të konfiskuara, në zbatim të ligjit nr.9258, datë 15.7.2004 “Për masat kundër financimit të terrorizmit”, si dhe për administrimin e pasurive të tjera, të cilat janë produkt i veprave penale apo të lidhura me to, administrimi i të cilave i caktohet kësaj agjencie, me ligj apo me një akt tjetër nënligjor.”.

4. Pika 3 e kreut II, ndryshohet si më poshtë vijon:

“3. Administratori/administratorët e pasurive të sekuestruara/konfiskuara, sipas dispozitave të ligjit nr.10192, datë 3.12.2009 “Për parandalimin dhe goditjen e krimit të organizuar dhe trafikeve nëpërmjet masave parandaluese kundër pasurisë”, zgjidhen nga gjykata, sipas listës së paraqitur nga kryeadministratori. Administratori/administratorët e pasurive të sekuestruara apo të konfiskuara, në zbatim të ligjit nr.9258, datë 15.7.2004 “Për masat kundër financimit të terrorizmit”, si dhe të pasurive të tjera, administrimi i të cilave i caktohet kësaj agjencie, me ligj apo me një akt tjetër nënligjor, përzgjidhen nga kryeadministratori, nga e njëjta listë e paraqitur në gjykatë.”.

5. Pas pikës 3 të kreut III, shtohet një paragraf, me këtë përmbajtje:

“Pagesa e administratorit të pasurive të sekuestruara apo të konfiskuara, në zbatim të ligjit nr.9258, datë 15.7.2004 “Për masat kundër financimit të terrorizmit”, si dhe të pasurive të tjera, administrimi i të cilave i caktohet kësaj agjencie, me ligj apo me një akt tjetër nënligjor, miratohet, rast pas rasti, nga Ministri i Financave, pas propozimit të kryeadministratorit. Pagesa e personave të tjerë, të punësuar në agjenci, përcaktohet nga Ministri i Financave, në përputhje me organikën dhe strukturën e miratuar nga Kryeministri.”.

6. Në kreun VI “Dispozita të fundit”, shtohet pika 3, me përmbajtjen si më poshtë vijon:

“3. Kontratat e lidhura me administratorët e pasurive dhe personat ndihmës, vijnë në efektet ligjore deri në përfundimin e tyre. Me përfundimin e afateve, zëvendësohen, në përputhje me dispozitat e këtij vendimi.”.

Ky vendim hyn në fuqi pas botimit në Fletoren Zyrtare.

KRYEMINISTRI
Sali Berisha